

KARÁSIA

Paoro Iokanatsopata Karásia Auakanimoni

1 ¹Nota Paoro iokanatsopata ia aätsopa hñtemoni. Nota Teoso iokanatakitino kãkitimoni Teoso iokanapirena nisãpiretini ãkapani. Kona kãkitini iokanatano nota. Xesosi Kristora iokanatano nota. Añri Teoso, Xesosi ipinaãka atoko õkitikakarira, iuara iokanatano nota kãkitimoni. ²Ikinika añtariakori notakata auakani, nota apaka xinikanãtai hñte. Hñte ikini aikoti Teoso misãkiretikoõtaã apotiitakaniua Karásia tixini auakani axinikanãtapika.

³Añri Teoso, Xesosi Kristo aãuñte pakini sikari ikinipoko erekari hñtemoni. Ninoa kamaerekaxiniretai hñte.

⁴Xesosi ipina amaerekani imaktxakini ãkapani. !Erekari uatxa auakani. Maerekati kamakani sauaki aãuakasaaki, Xesosi ipina ate imaktxakini ãkapani, amapinakani ãkapani. Xesosi ipñpe ate ãkapani, kotxi añri Teoso nirekari Xesosi ipinini ate maerekani imaktxakini ãkapani. ⁵Ikiniõtika: “Peerekai,” matxari Teoso. ãtipirika kãkiti txapikari Teoso: “Peerekai.” Ameẽ.

ãti Iokanapirena Erekari !Auari

⁶Nikenakopiretari Teoso hñtakanapaãpotini. Iuasaaki nitsorñkaãnãta. Kinirepa hñtakanapari Teoso sãkire? Kotxi mapa kasiritinoka hñte auikari Teoso iokanapirena erekari. Kristo iteene tiretai hñte, ininiã akiritai hñte inakitiakori hininiua ãkapani. Kinirepa hãuikatari ãti iokanapirena? ⁷Atão nisãpiretai hñte. ãti iokanapirena erekari !auari. Nikenakopiretari kãkiti hñte oereẽkani. Ninoa nirekari

ikoketinirina isākirena Kristo iokanapirenakata. Uatxa !himarotaikari atão sãpirenatxi. ⁸Atão asãpiretapekai Teoso iokanapirena erekari. Ātião sākiretxiti asãpiretiniāi, Teoso iokanataua ate kākiti misiritikomoni, ātipirika misirikaretxi auiniātaã. Teoso nitiri iaxitikiri apaka sãpiretiniāi ātião iokanapirenatxi, Teoso iokanataru iua initiri imisiritikomoni ātipirika misirikaretxi auiniātaã. ⁹Hĩte auikapekari Teoso iokanapirena erekari. Ātião iokanapirenatxi sãpiretakari sãpiretiniāi Teoso iokanapirena atão minakati, iokanataākako imisiritikomoni ātipirika misirikaretxi auiniātaã. Asãpiretapekai ikara inakari sākiretxiti. Uatxa iuaĩkana nisãpiretai.

¹⁰Ikara atoko nitxai hĩte, ininiã himarotari kona ninirekari: “Peerekari Paoro kamakiti,” niniko. Nota nirekari Teosonoka: “Peerekari Paoro kamakiti” ininino. Nanera atão minakati sãpiretakani txai hĩte: “Paoro nirekari kākiti apokaerekatini iua.” Ikara na atãoni. !Ninirekari kākiti apokaerekatini nota. Ninirekiniāri kākiti apokaerekatini, kona Kristo nitiri !nitxaikaua.

Teoso Akiritari Paoro

¹¹Nanera atão minakati sãpiretakani hĩte oereẽkani: “Paoro iokanapirena kona Teoso iokanapirenani,” itxana ninoa sākire. Nitariakori atãopitikara nisãpiretai hĩte. Iokanapirenatxi hĩtemoni nisãpiretakiti kona kākiti sākireni. Teoso sākirera. ¹²Kona kãkitini sãpiretano ia iokanapirenatxi. Kona kãkitini oerekano. Xesosi Kristora sãpiretano nota iua iokanapirenatxi.

¹³Hĩte imarotari mitxi nauakasaaki, Xoteo kiomaneakorini oerekakiti nauikasaaki, iusaaki kona nitiretana Xesosi sākire auĩākani. Iteene nimisiritana ninoa. Ninirekari nixipokiniri Xesosi sākire kĩpitakani. ¹⁴Iusaaki nimarotari Xoteoakori kitxakapirĩkarini paniãtakiti. Nikamari imakinika ninoa paniãtakiti. Iusaaki nimoianariakori apaka kamari ninoa kitxakapirĩkarini paniãtakiti. Nota apiata kamari ninoa sākire iaõka. Iteene ninirekari nikaminiri kitxakapirĩkarini paniãtakiti.

¹⁵Teoso iteene turetano nota. Iua mereẽno nota nauini apisapanika. Iusaaki akiritano nota initiri nininiua tĩkane. ¹⁶Teoso keto manapi apokasaaki, oerekari imi notamoni, imi Xoteo minakonimoni nisãpiretini ĩkapani. Iusaaki kona nisãpiretari kākiti Teoso oerekakiti sākiretxiti, ininiã na kãkitini sãpiretano nikamakiti tĩkane. ¹⁷Iusaaki kona nisari Xerosareẽ sitatxitimoni, ininiã nota apisapanika Teoso

iokanatakini kona õtãkikano. Kona kãkitimonini nisa noerekiko ïkapani. Arãpia tixinimoni nisapitipo. Eereka nikanapiriã Tamásiko sitatxitimoni.

¹⁸Ïpi anokanani, ãti anokanani pakinikanani napaãka atoko, nisa Xerosareẽmoni Petro nimisãkiretini ïkapani. Ïpi semanati ninapa Petrokata. ¹⁹Apanakini Teoso iokanatakini isãkire sãpiretakani kona naõkita. Apiananiri itari Txiako inakorinoka naõkita. Ininiãkara kona kãkiti sãkireni nisãpiretai hïte. Teoso iokanapirenakara nisãpiretai hïte.

²⁰Ia niõkatsopatakiti nisãpiretakiti hïtemoni atão inakari. Teoso imarotari atão inakari nisãpiretinii.

²¹Xerosareẽmoni nisaãka atoko, nisari Síria tixini, Sirísia tixini apaka. ²²Iuasaaki Kristo sãkire auĩãkani, Xotéia tãpa auakani, !aõkitapanikano nota iuasaaki. ²³Ninoa imarotari apanakini minapiretakiti. Apanakini sãkire: “Kiki mitxi ate misiritakari, uatxa sãpiretari Xesosi sãkire. Mitxi iua nirekari ixipokiniri Xesosi oereẽkiti sãkiretxiti, iuaritika uatxa inirekari oerekiniri Xesosi oerekakiti sãkiretxiti kãkitimoni,” itxana apanakini sãkire. ²⁴Ininiãkara ninoa: “Peerekari Teoso,” itxana, kotxi nota auikapekari Xesosi sãkire.

Xesosi Iokanatakini

Apakapari Paoro

2 ¹Katosi anokanani napaãka atoko, nikanapiriã Xerosareẽmoni nimoianari Panapee inakorikata. Nanikari nimoianari Txito inakori apaka notakata. ²Xerosareẽmoni nisa, kotxi Teoso oerekano nisini iuamoni. Iuaã napokasaaki, nisãkirauata Xesosi sãkire auĩãkani auĩteakorikata. Ninoakatanoka nisãkirauata. Teoso iokanapirena erekari Xoteo minakonimoni nisãpiretakiti nisãpiretana ninoa. Nota nirekari ninoa imarotiniri nisãpiretakiti atão inini. Apaka ninirekari ninoa imarotiniri iuaĩkana katana nisãpiretakiti atão inini ïkapani. Nisãpiretakiti ikenakotakasaakina, ninoa: “Atãopitikara pisãpiretakiti Xoteo minakonimoni,” itxana. ³Txito nimoianari na Xoteo !itxaua. Krekora itxaua, ininiãkara Teoso takaõtxikare !uari iuamoni, iuaritika Xesosi sãkire auĩãkani auĩteakori na paniãtari itsiki mata kisauakiko. ⁴Mitxi apanakini kikiakori apoka iuaã. Ninoa sãkire: “Ate auikari Xesosi sãkire,” itxana ninoa. Txamari na atão ninoa sãkire. Ninoa apotiitaua Xesosi sãkire auĩãkanikata. Inirekarina Txito ïtoã Teoso takaõtxikare takiko. Ninoa nirekari imarotininirina kitxakapiriĩkarini

Xoteo kiomaneakorini paniãtakiti atakanapini, kotxi atakanapapekari ipixini ninoa paniãtakiti, kotxi Kristo Xesosi nakitiakori atxapekaua. Ninoa nirekari imarotiniri ikinika ate oerekakiti sãkiretxiti. Ninoa nirekari ate kaminiri ikinika kitxakapirĩkarini Xoteo kiomaneakorini paniãtakiti. Ninoa nirekari ikinika Xesosi sãkire auiãkani, Xoteo minakaniua apaka kaminiri Xoteo kiomaneakorini paniãtakiti. Ninoa nirekari nitirixi amotakoni atoko aniniua. ⁵Kona xatiki akamari ninoa nireẽkiti, kotxi inirekarina Teoso iokanapirena atão inakari akoketini Xoteo kiomaneakorini paniãtakitikata. Ate nirekari Teoso iokanapirena atãonoka inakari asãpiretinii.

⁶Xesosi sãkire auiãkani auĩteakori txari notamoni: “Xoteo minakonimoni pisãpiretakiti erekapitikari. Apikomoni ate sãkire !auari ninoa pisãpiretini ĩkapani,” itxana. Ninoa auĩtetxiakori itxauana, iuaritika Teosomoni ninoa apanakini kãkiti poiãorini atokotxikana itxauana, kotxi Teoso atamatari aãkixinire. Ininiãkara nota !nipĩkari auĩtetxi. ⁷Ninoa Xesosi sãkire auiãkani auĩteakori apokaerekatari niparĩka. Ninoa imarotari Teoso sikano nota ia parĩkatxi, ia iokanapirenatxi erekari nisãpiretinina Xoteo minakaniua. Iua atokotxikana Teoso sikari parĩkatxi Petromoni, iokanapirenatxi erekari Xoteoakori isãpiretini ĩkapani. ⁸Teoso iokanatari Petro Xoteoakorimoni, ininiã isikaposotiiretari iua ninoa sauaki iparĩkauatakasaaki. Iua atokotxikana Teoso iokanatano nota Xoteo minakonimoni. Nota apaka isikaposotiireta ninoa sauaki niparĩkauatakasaaki. ⁹Iuasaaki ninoa auĩteakori Txiako, Petro, Xoão pakini imarotari Teoso sikinino notamoni ia parĩkatxi, ininiãkara imaĩkarina niuako, Panapee uako pakini, kotxi akinika aparĩkauata Teoso ĩkapani. Akinika aãpokaerekatari nota, Panapee pakini sãpiretiniri Teoso sãkire Xoteo minakonimoni. Akinika aãpokaerekatari Txiako, Petro, Xoão pakini sãpiretiniri Teoso sãkire Xoteoakorimoni. ¹⁰Ninoa paniãtaua ate matxineiroteni atiretini. Iuanoka ipaniãtaua. Napokaerekatari ninoa sãkire, kotxi ninirekapitikari matxineiroteni nitiretini.

Paoro Ôtãkikari Petro

¹¹Eereka Petro motikaẽtaua ate Ãtxiokia sitatxiti aãuakasaaki. Iuasaaki Petro kamakiti na atãoni. Ininiãkara nota sãkirauata Petro apisatoõ: “Petro, pite kerokari,” nitxari iua. ¹²Merepanika Petro nipokota ikiniõtika aĩtariakori Xoteo minakonikata. Eereka ãtikaka

kikiãkini apoka Txiako iokanatakini. Iusaaki Petro pĩkana ninoa, ininiã kona inikaika aĩtariakori Xoteo minakonikata, Xoteo kiomaneakorini sãkire xika, kotxi ninoa sãkire: “Kãkiti Teoso takaõtxikare iĩtoã mauakaniã, !pinipokotape ninoakata,” itxana ninoa sãkire. Petro pĩkana Txiako iokanatakini, kotxi ninoa nirekari Teoso takaõtxikare auini aĩtariakori iĩtoã, Xoteo minakanuia iĩtoã. ¹³Apanakini Xoteoakori Xesosi sãkire auiãkani apaka kamari Petro kamakiti atokokana, ininiã ninoa apaka kerokari. !Inipokotaikana aĩtariakorikata, Xoteo minakanikata. Ninoa kerokiniri xika Panapee apaka kerokari. Iua apaka !inipokotaika aĩtariakorikata, Xoteo minakonikata. ¹⁴Nimarotakasaakiri ninoa kerokiniri ikamakitina, nota misãkiretari Petro ikinimane õkiãtaã, kotxi ninoa !ikamari atão inakari. Teoso iokanapirena erekari iaõka !ikamana. Nĩtxari iua: “Xoteokarai, iuaritika pauanãta Xoteo minakanuia sauaki, ininiã Xoteo kamakiti atoko !pikamaika. Xoteo minakanuia atoko pitxaua. Ininiãkara kinirepa pite paniãtana Xoteo minakanuia: ‘Hĩkĩpitariko Xoteo kiomaneakorini sãkire?’ !Erekari,” nitxa Petromoni.

Xesosi Sãkire Auikiko Kamaerekatari Kãkiti

¹⁵Ate Xoteo atxaua, kotxi aĩri, ainoro pakini Xoteo txaua apaka. Xoteo kiomaneakorini sãkire: “Xoteo minakanuia maerekati kamakani itxauana,” itxana isãkirena. Xoteo minakanuia !atxaua ate. ¹⁶Aimarotari, aãuikiniãri Xesosi Kristo sãkire, iua kamaerekatari aãkixinire, ininiãkara Teoso apakapaua. Kitxakapirĩka Teoso sãpiretari Moisesi ipaniãtakiti kãkiti kamini tĩkane. Ininiãkara Moisesi iõkatsopatarikara Teoso sãkire. Txamari !aposotari akaminiri imakinika Teoso paniãtakiti, Moisesi iõkatsopatakiti, ininiãkara !ikamaerekatari aãkixinire. !Apakapaua ate. Ate auikari Xesosi sãkire ereka anini ikapani, ininiã Teoso apakapapitikaua ate. Teoso paniãtakiti iõkatsopatakori ikinika !aposota akamini, ininiã Xesosi kamaerekatari aãkixinire Teoso apakapiniua ikapani, Kristo sãkire aãuikasaaki. ¹⁷Anirekasaakiri Teoso kamaerekatinina, aãpoka Kristomoni. Iusaaki aimarotari maerekati kamakani aniniua. Iuaritika Kristo makatxakari amaerekani Teoso apakapiniua ikapani. Ikara atoko ininiã, atxiĩti Kristo nirekatari maerekati akamini, imakatxakiniri ikapani? Konapitini. ¹⁸Atxiĩti kãkiti imarotari Xoteo kiomaneakorini paniãtakiti kamiko na kamaerekatari kãkiti aãkixinire, ininiã itakanapari ninoa paniãtakiti ikamini. Atxiĩti ãti õti iuaĩkana ikamari ninoa Xoteo kiomaneakorini paniãtakiti iaõka, ininiã iusaakiikarako ikerokari. ¹⁹Moisesi iõkatsopatakiti oerekano

nota ipĩkari atoko nininiua, kotxi nota kona posotari ikinika Moisesi iõkatsopatakiti iaõka nikamini, ininiã nimisiritiko auapitikako. Ininiã nimarotari Moisesi iõkatsopatakiti kona makatxakari nimaerekani. Ininiã nimarotari Xesosi sãkire auiãkarinokara auapininiika. Ininiã uatxa ikiniõtika ninirekari Teoso nireẽkitinoka nikamini. ²⁰Xesosi okaãka aamina ipiriãmitakari nopini. Aamina ipiriãmitakari nopini okakori atoko nitxaua, kotxi maerekati mitxi nikamakiti lninirekaikari nikaminiri. Mitxi ninireẽkiti kona auaika. Iuaritika auãkipanika nitxaua, kotxi Kristo aua nãkixinireẽ. Teoso ãkiri sãkire nauikiniã, auãkipanika nitxa. Iua taretano nota. Iua ipĩpe nota ikapani. ²¹Moisesi iõkatsopatakiti kamiko kamaerekatiniãua ate, kinirepa Xesosi ipina? Moisesi iõkatsopatakiti kamiko na xatiki kamaerekataua ate. Teoso tiraõkinokara kamaerekatari aãkixinire.

Natokopa Itxa Teoso Kamaerekatiniua?

3 ¹Hĩte Karásia tixini auakanii kona kiĩkitei hĩte. Kipa misirienetai hĩte atão inakari himakamakani ikapani? Kotxi himarotapitikari atão inakari. Himarotari Xesosi Kristo ipina aamina ipiriãmitakari nopini amaerekani imaktxakini ikapani. Ate oerekapekai ikara atão inini. ²Ianoka nipimaãi hĩte: Kisaakipa hãpakapari Erekar Matamatakoti? Hãpakapatari iua, Moisesi paniãtakiti hĩkamakasaaki? Konapitini. Hãpakapatari Erekar Matamatakoti Teoso iokanapirena erekari hãuikasaaki? Ari, Teoso iokanapirena erekari hãuikasaaki, iusaakiikara hãpakapari iua Erekar Matamatakoti. ³Kipa iomaiĩkitetai hĩte? Merepanika Teoso sikari Erekar Matamatakoti hĩtemoni, ininiã Erekar Matamatakoti sikaposotiiretai hĩte Teoso paniãtakiti hĩkamini ikapani. Uatxa hĩxinikatar Teoso paniãtakiti hĩkamini hĩteka posotiireẽkani? Konapitini. Kona hĩte posotari. ⁴Himisiritapeẽkaika Xesosi sãkire hãuikini xika. Kinirepa himĩteenekatari himisiritiko? Atauako uatxa kona hãuikaikari mitxi hãuikakiti Xesosi sãkire? ⁵Kirisaakipa Teoso sikari Erekar Matamatakoti hĩtemoni? Kirisaakipa Teoso oerekari iposotiire hĩtemoni? Atauako ikara atoko itxa Moisesi paniãtakiti hĩkamakasaaki? Konapitini. Isikai Erekar Matamatakoti, oerekai iposotiire, Teoso iokanapirena hãuikasaaki.

⁶Hĩxinikariko Apraõni. Apraõ auikari Teoso sãkire, ininiãkara Teoso kamaerekatari iua, ininiã Teoso apakapari iua. ⁷Ininiã ninirekari himarotiniiri, kãkiti Teoso sãkire auiãkani Apraõ apika mekaniriakori atão inakani itxauana ninoa. ⁸Teoso kamaerekatari

Xoteo minakaniua, kotxi ninoa auikari Xesosi sãkire. Kitxakapirĩka Teoso sãkire iõkatsopatakori sãpiretapekari ikara Teoso iokanapirena erekari Apraõomoni. Ikara iõkatsopari txari: “Nota sikariko erekari ikinimane kãkitimoni, kotxi pite Apraõo auikari nota sãkire.” ⁹Apraõo kĩpitari Teoso sãkire, ininiãkara Teoso takari erekari iuamoni. Iua atokotxikana Teoso takari erekari iua sãkire kĩpitakanimoni.

¹⁰Apanakini uãkatari Teoso apakapinina ninoa, kotxi ikĩpitarina Moisesini sãkire. Txamari Teoso misirikare pamonõkonipaniriko ninoamoni, kotxi Teoso sãkire iõkatsopatakori txari: “Teoso misiritariko kãkiti ikinika Moisesi paniãtakiti ikiniõtika imakamakanisaaki.” ¹¹Teoso sãkire iõkatsopatakori txari: “Teoso kamaerekatariko kãkiti, iua sãkire auĩãkani. Ininiã isãkire auĩãkani auapininiika itxako Teosokata,” itxa Teoso sãkire iõkatsopatakori. Ininiãkara aimarotari Moisesi paniãtakiti kĩpitiko kona kamaerekatari kãkiti. ¹²Moisesini iõkatsopatakiti kona paniãtaua aãuikiniri Xesosi ipinini amaerekani imakatzakini ãkapani. Moisesi iõkatsopatakiti paniãtaua akaminiri ikinika Teoso paniãtakiti. Teoso sãkire iõkatsopatakori txari: “Kãkiti, Teoso paniãtakiti iõkatsopatakori ikinika makerokakatirako auapininiika itxako Teosokata,” itxa Teoso sãkire iõkatsopatakori.

¹³Txamari ãtika Teoso paniãtakiti Moisesi iõkatsopatakiti akerokiniã, amisiritaãkako. Kristo makatzakaua ate ikara misirikaretxi monõkori, kotxi Teoso misiritari Xesosi Kristo aamina ãpiriãmitakari nopini ate maerekani xika ate mapinakani ãkapani. Teoso sãkire iõkatsopatakori txari:

Kãkiti aamina nopini okakori Teoso misiritakiti itxaua.

¹⁴Teoso sikaenetari erekari Apraõomoni. Kristo ipĩpe hĩte Xoteo minakaniua ikara erekari hãpakapini ãkapani. Ininiã Xesosi Kristo sãkire aãuikasaaki, aãpakapari mitxi Teoso sikaenetakiti. Aãpakapari aãkixinireẽ Erekari Matamatakoti, Teoso sikaenetakiti atemoni.

Teoso Sikaenetakiti Sãkiretxiti

¹⁵Nitariakori, ikinimane kãkiti imarotakiti nisãpiretaiko hĩte, noereẽkiti sãkiretxiti iteene himarotini ãkapani. Ipi kãkiti aua itiina isikaenetakakana. Iuasaaki, iõkatarina iuãkana isikaenetakitina tsopaã. Eereka lauiritaãkana imaxinĩkaretinirina isikaenetakitina. Apaka lauiritaãka sãkiretxi apikomoni itakinina isikaenetakitina tsopaã. Teoso sikaenetakiti inakitiakorimoni ikara atoko itxa. ¹⁶Himarotariko

ia. Teoso sikaenetari erekari Apraãomoni, Apraão apika mekanirimoni apaka. Teoso sãkire iõkatsopatakori na txari: “Apika mekaniriakori.” Teoso sãkire iõkatsopatakori txari: “Apika mekaniri.” Ininiã átika apika mekaniri. Kristo itxaua iua. ¹⁷Ia ninireka nisãpiretinii. Kitxakapirika Teoso sikaenetakiti Apraãomoni apokapeka. Koatrosëtosi tríta pakini anokanani Apraão auaka atoko, Teoso sãpiretari Moisesi ipaniãtakiti iõkatsopatiní ìkapani kãkiti kamini ìkapani. Moisesi iõkatsopatakiti kona xipokari Teoso sikaenetakiti Apraãomonikari. ¹⁸Teoso sikari Kristo kãkitimoni, kotxi mitxi isãpiretari isikaenetakiti Apraãomoni. Teoso sikasaakiri ipaniãtakiti sãkiretxiti Moisesimoni ikara iaõka kãkiti kamini ìkapani, isikaenetakiti auapeka iuasaaki. Ipaniãtakiti sikiko !ixipokari isikaenetakiti.

¹⁹Ininiãkara kininiãpa Teoso sikari ipaniãtakiti Moisesimoni kãkiti kamini ìkapani? Teoso paniãtakiti iõkatsopatakori oerekaua maerekati kamakaniu a ate, kotxi !aposotari ikinika ipaniãtakiti akamini. Kristo, Apraão apika mekaniri ìkorapokoriti apokini apisapanika, Moisesi iõkatsopatakiti oerekaua Teoso nireëkiti akamini ìkapani. Teoso sikaenetakiti itxaua Xesosi Kristo. Teoso sikasaakiri ipaniãtakiti sãkiretxiti Moisesimoni, Teoso nitiriakori aua iuaãtaã. Teoso sãpiretari isãkire Moisesimoni. Eereka Moisesi sãpiretari kãkiti. ²⁰Teoso sãpiretakasaakiri Apraão isikaenetakiti, !ipaniãtari ãti kãkiti sãpiretiniri Apraão. Teosonokara sãpiretari Apraão.

Moisesi Iõkatsopatakiti

²¹Moisesi iõkatsopatakiti aãuikiniã, atxiiti !anirekaikari Teoso sikaenetakiti? Anirekapitikari. Akiomaneakorini paniãtakiti sãkiretxiti, kona txikitakaua aãuapininiika anini tìkane. Ininiãkara akiomaneakorini sãkire kona kamaerekataua ate, ininiã Teoso kona apakapaua ate, ininiãkara kona aãuapininiika !atxa Teosokata. !Auari mauritakoti sãkiretxiti kãkiti auapininiika inini txikitakakari. ²²Teoso sãkire iõkatsopatakori txari: “Ikininape kãkiti kamari maerekati.” Kateia ãki auakani atoko atxaua, kotxi !aposotari erekari akamini. Teoso sikaenetakiti sikaãka Xesosi Kristo sãkire auiãkanimoni.

²³Xesosi Kristo sãkire auikiko apisa, kãkiti kateia ãki auakani atokokana itxauana. Kãkiti moiaãkari atoko itxaua Teoso paniãtakiti Moisesimoni sikakori. !Aposotari anirekinimoni asini. Uatxara aposotapitikari anirekinimoni asini, kotxi Xesosi apokapeka ìkorapokoriti. Ipinapeka kãkiti ìkapani, ininiã uatxa aãuikiniãri iua

sãkire, kona Teoso misiritaikaua uatxa. ²⁴Kristo mapokakani apisa, ate oerekakari atoko itxaua Teoso paniãtakiti iõkatsopatakori. Kristomoni anikakari atoko itxaua ikara. Kristo apokasaaki, Teoso kamaerekataua ate, kotxi aãuikari Kristo sãkire. ²⁵Uatxa apokapeka Xesosi Kristo sãkire auikiko. Ininiãkara Teoso paniãtakiti iõkatsopatakori limoiaãikaua ate.

²⁶Teoso anaakori hĩtxaua, kotxi hãuikari Kristo Xesosi sãkire. ²⁷Hĩte patxisatapeẽkaika, ininiãkara hĩpatxisatiko oerekari apanakini Kristo ãtipirika himoianatini ãkapani. Ininiãkara Kristo atokopeka hĩtxa. ²⁸Ikara atoko aniniã, akinika Kristo Xesosi nakiti atxaua, kotxi akaikotapika iuakata. Xoteoakori, Xoteo minakaniua, nitiritxi, nitiritxi minakaniua, kiki, sito, amakinika Kristo nakiti atxaua. ²⁹Kristo nakiti pininiãua, Apraão apika mekaniri pitxaua apaka. Ininiã pite apakapapitikariko Teoso sikaenetakiti.

Teoso Anaakori

4 ¹Apikomoni nisãpiretaiko hĩte ãti sãkiretxiti. Amarini !apakapari irini tii itakanapakiti iua ãkapani, kotxi xapitipanikari. Ikinipoko irini nakiti imi nakiti txapekaua, iuaritika na apakapapanikari. Axapitipanika inakasaaki, nitiritxi atoko itxaua. ²Axapitipanika inakasaaki apanakini moiaãri iua. Ninoa nĩkatari itxineirote. Irini ketotiniri manapi apokasaaki, imi apakapari ikinika irini tii itakanapakiti. ³Mitxi iua eenetxi atoko atxaua ate. Nitiritxi atoko atxaua ate. Akiomaneakorini paniãtakiti sãkiretxiti amoaãkiri atoko itxaua, kotxi oerekaua akamakiti tĩkane. ⁴Teoso iokanatarari imi kãkitimoni iketo manapisaaki. Sito ãto ãki aua merepanika, ikinimane kãkiti atoko. Iua kĩpitari ikinika Teoso paniãtakiti iõkatsopatakori. ⁵Amakamakaniãri ikinika Teoso paniãtakiti iõkatsopatakori, amisiritiko auapitika. Xesosi makatxakaua ate amamisiritakoni ãkapani. Ininiã Teoso anaakori atxaua.

⁶Teoso anaakori aniniãua, Teoso iokanatarari Erekarri Matamatakoti imi nakiti aãkixiniremoni. Ininiã iua Erekarri Matamatakoti aãkixinireẽ auiniã, aãkiritari Teoso: “Papai, niri,” atxariko. ⁷Ininiã nitiritxi atoko !atxaikaua. Teoso anaakori atxapekaua. Iua anaakori aniniãua, ikini isikaenetakiti isikaua atemonikari, kotxi Kristo makatxakapekari amaerekani.

!Erekaxinireri Paoro Karásia Auakani Xika

⁸Mitxi hĩte !imarotari Teoso. Iuasaaki nitiritxiakori amotakoni atoko hĩtxaua. Hĩparĩkauata teoso minakanuia ĩkapani. ⁹Uatxa hĩte imarotari Teoso. Ari, uatxa Teoso imarotai hĩte. Ininiã kinirepa hĩte nirekari hĩkanapiriini mitxi hĩauĩteakorimoni. Kona kaposotiirena ninoa. !Kiĩkitena ninoa. Kinirepa hĩte nirekari iuaĩkana ninoa nitiriakori amotakoni atoko hininiãua? Kinirepa hĩte nirekatari iuaĩkana hĩuikiniri ninoa oereẽkiti sãkiretxiti? ¹⁰Hĩte nirekari Xoteo kamakiti atoko inakari hĩkamini. Hĩuãkatari Teoso apokaerekatinii hĩte, kotxi ninoa kiinirite atokotxikana hĩte apaka kama. ¹¹Ininiã !erekaxinireno nota ikara nikenakoenetini. Atauako maxikatiĩka nota sãpiretari Teoso sãkire hĩtemoni?

¹²Nitariakori, nota iteene õtãkikai hĩte. Hĩtakanapariko Xoteo ki maneakorini paniãtakiti hĩkamini. Nota atoko hĩtxako, kotxi hĩte sauaki nauakasaaki nota hĩte atoko nitxaua. Xoteo minakanuia atoko nitxaua. Hĩtekata nauakasaaki, !himisiritano nota. Hĩtoretano nota. ¹³Hĩxinikari merepitipanika Teoso iokanapirena erekari hĩte nisãpiretakasaaki, namianare xikara nisãpiretai hĩte, hĩtekata nauakasaaki. ¹⁴Iuasaaki namianatakasaaki, hĩparĩkauatapitipo nota ĩkapani. !Hinaiakakano. !Hĩokanatanano nisini namianare xika. Hĩte apakapano nota Teoso nitiri iaxitikiri hãpakapini atokokana. Hĩte apakapano nota, Kristo Xesosi hãpakapini atokokana. ¹⁵Iuasaaki hĩte iteene hĩpoxokoniua. Nimarotari ereka hinini, kotxi noki amianatakasaaki, hĩposotaãkamariko, himakatzakamariko hĩteka oki notamoni hĩsikini ĩkapani. ¹⁶Atauako uatxa himokaiakari nitxataua nota, atão inakari nisãpiretinii xika?

¹⁷Ninoa kamisirienererini iteene turetãpitikamai hĩte, txamari ninoa ãkixinire nireẽkiti !erekari hĩte ĩkapani. Inirekarina hĩte omanatinuia ate. Inirekarina hĩte apokaerekatinina ninoanoka. ¹⁸Erekari kãkiti iteene turetini hĩte, ãkixinire inireẽkiti erekari inakasaaki. Nota hĩtekata nimauakanisaaki apaka, erekari kãkiti iteene turetini, ãkixinire inireẽkiti erekari inakasaaki. ¹⁹Hĩte namariteni nota turetãkini atoko hĩtxa. Hinoro atokotxikana nitxa nota. Kaiamapeka auenetakaro atoko nitxa, kotxi nota atatsiirauata hĩte xika. Kristo kamakiti atokotxikana hĩkamakasaaki, iuasaakinoka nitsii nãkixinire auakari iotoka. ²⁰Kinirão auaka nitxa hĩtekata uatxa. Ninirekari aãpisatoõtakakiniua, ininiã nixinikakiti ipinimonipo itxa atxiĩti. !Erekaxinireno nota hĩte xika.

Akaa, Sara Pakini

21 Hīte Xoteo kiomaneakorini paniātakiti nireēkani, himarotatari ninoa sākire? 22 Teoso sākire iōkatsopatakori sāpiretaua, ipi Apraão anaakori aua. Sito niterotxi iamotakitokata aua imi āti. Niterotxi minakotokata ĩtanorokata aua āti imi. 23 Akaa inakoromoni, niterotxi iamotakitomoni imi aua, kotxi Apraão sirīka oakata. Imi aua Saramoni niterotxi minakotomoni, kotxi Teoso sikaenetari iua imi. 24 Apraão anaakori oerekaua Teoso parīka kākiti ĩkapani. Iparīka ipi aua, naia sito ipi atoko. Akaa inakoro ākiri nitiritxi amotakori itxaua. Teoso parīka ōtanoxiratari Sinai inakori iua auakasaaki, niterotxi Akaa atoko itxa. Teoso paniātakiti iusaaki amakamakaniā, amisiritiko auapitikako, nitiritxi amotakori atokotxikana. Nitiritxi makamakaniāri ipatrāote paniātakiti imisiritiko auapitikako. 25 Ininiākara ōtanoxiratari Sinai inakori Arápia tixini auakari Akaa atoko itxa. Apaka ĩkorasaaki Xerosareē sitatxiti oa atokokana itxa, kotxi Xerosareē auakani Akaa anaakori atoko itxana ninoa. Nitiritxiakori amotakoni atoko itxana. Ninoa Xerosareē auakani !ikamari ikinika Teoso paniātakiti, ininiā Teoso misiritapitikanako ninoa. 26 Āti Xerosareē auapitika, iaxiti auakari Xerosareē, Teoso tixine. Xerosareē iaxiti auakari Sara atoko, kotxi Sara niterotxi amotakoro !otxaua oa. Ate inoro atoko otxaua oa. Sara ākiri atoko atxaua, kotxi amisiritiko !auaika. Aāuikiniāri Xesosi sākire, akiomaneakorini kona paniātaikaua ate ninoa nireēkiti akamini. 27 Teoso sākire iōkatsopatakori txari:

Pite sito meenetoi pipoxokoniuatako. Pite sito pauākitakarauatini tsii mimarotakatoi, pixikarauata pipoxokoniritika, kotxi pite takanapakoroi, itori pamariteakori auako. Kĭtaniriro poiāoka oamariteakori auako, itxa Teoso sākire iōkatsopatakori.

28 Ininiā nitariakori, Sara ākiri, Isaki inakori atoko atxaua, kotxi Teoso sikaenetari Apraão imi Saramoni auini. Iuatxikana Teoso sikaenetaua Xesosi amaerekani imakatzakini ĩkapani, Teoso anaakori aniniua ĩkapani. 29 Akaa ākiri Isimaeo inakori iponaniā, kotxi Apraão nirekari imi, ininiā iua sirīka Akaakata. Sara ākiri Isaki inakori iponaniā Erekar Matamatakoti posotiireē. Eereka Isimaeo misiritari Isaki. Iua atokokana itxa uatxa. Teoso anaakori minakaniua misiritari Teoso anaakori. 30 Teoso sākire iōkatsopatakori txari:

Hïokanataroko niterotxi iamotakoro osipinini imikata, kotxi niterotxi ãkiri kona apakapapaniri ipixini iri tii. Niterotxi minakoto ãkirinoka apakapari iri tii, itxa Teoso sãkire iõkatsopatakori. ³¹Ininiã nitariakori, niterotxi amotakoro ãkiri atoko !atxaua. Niterotxi minakoto ãkiri atoko atxaua.

Takaõtxikari !Ikamaerekatari Kãkiti

5 ¹Nitiritxi kamari ipatrãote nireëkitinani. Ikara atoko uatxa !atxaika, kotxi aãuikari Kristo sãkire. Kristo makatxakapekaua amisiritiko monõkoni. Ininiãkara nitiritxi amotakoni atoko iuaïkana !hïtxapeua. !Hãuiritapiri kãkiti paniãtinii ninoa auiãkiti hãuikini.

²Hïkenakotako. Nota Paoro sãpiretaiko hïte. Hãuiritiniãri takaõtxikari takiko hïtoã Xoteo atoko, ininiã hãuikari takaõtxikari kamaerekatinii hïte Teoso apakapiniã ikapani. Txamari na atão. Kristonoka kamaerekatari kãkiti Teoso apakapiniã ikapani. Erepaniko, pinirekiniãri takaõtxikari, !pinirekaikari Kristo. ³Iuaïkana nota õtãkikai hïte. Hãuiritiniãri takaõtxikari takiko hïtoã Xoteo atoko, ininiã Moisesi paniãtakiti ipixini hïkamapeka. Ikara atoko hininiã, ikinika ipaniãtakiti hïkamako. ⁴Ãtikaka hïte nirekari Moisesi paniãtakiti hïkamini Teoso kamaerekatinii ikapani. Txamari ikara atoko hinirekiniã, hïtakanapari Kristo. Ininiãkara Teoso !iposotari ikinipoko erekari isikinii. ⁵Atepekana, ate auikari Xesosinoka txïkitakiniri kãkiti ereka ininiã ikapani, Teoso apakapapiniã ikapani. Ikamaerekataua Erekari Matamatakoti posotiireë, kotxi aãuikari Xesosi sãkire. ⁶Takaõtxikari hïtoã auiniã, iua takaõtxikari !ikamaerekatai hïte. Takaõtxikari hïtoã mauakaniã, takaõtxikari mauakaniã !ikamaerekatai apaka. Kristo Xesosi nakitiakori aniniãua, Teosora kamaerekataua, kotxi aãuikari Xesosi sãkire, ininiã atiretari iua.

⁷Merepanika hïte auikapitikari Xesosi sãkire. Kipa xipokatari atão inakari Teoso sãkire hãuikini? Natokopa itxa Teoso sãkire atão inakari hïtakanapiniã? ⁸Hïte akiritakari itxaua Teoso. Kona iuani xipokari hãuikiniri atão inakari isãkire. ⁹Kãkiti sãkire txari: “Pão ãtikaãkari axapitiri ipani, iuaritika iãtikakakiti itori ipe.” Iua atokokana ãtika maerekati kamakari xika kaiõpopokori kãkiti kamari maerekati. ¹⁰Teoso kamaimaroretano nota hïte takanapiniri hïkerokakiti, atão inakari hïkaminiã ikapani. Hïte nitariakori hïtxaua, kotxi Apiananiri nakitiakori atxaua, ininiãrako nimarotari nota õtãkikinii iaõka hïkamapanikako.

!Nimarotari iua kiki himisirienetakiri. Ia nimarota. Teoso misiritapanikariko iua.

¹¹Apanakini sãpirenãtari: “Paoro paniãtari Xoteo minakanuia takiniri takaõtxikari iitoãna.” Na atão ninoa sãkire. Nipaniãtaãkamariko takaõtxikari takiko, nimisiritiko !uamakako. Kona nipaniãtari Xoteo minakanuia takiniri takaõtxikari iitoãna. Ikara xika nimisiritaãka. Nisãpiretari ia: Kristo aamina ipiriãmitakari nopini ipipe amaerekani imakatzakini ikapani. Kristonoka kamaerekataua Teoso apakapiniua ikapani. Ikara noerekakiti xika nimisiritaãka.

¹²Ninoa kamisirienererini nirekiniãri itsiki mata kisauakiko, erekari itsikipati tsotatiko apaka. Nomanãkarauata, ninoa misirienetini xika.

¹³Nitariakori, Teoso akiritai hite iua nakitiakori hininiua ikapani, ininiãkara uatxa hiposotari hitoka nireekiti hikamini. Iuaritika !hikamapiri maerekati hiito nireekiti. Ia hikamako: Hitiretakakauako atipirika. Ikara atoko hininiã, himoianatakakauako. ¹⁴Teoso paniãtakiti txari: “Pitiretana apanakini piteka pitiretiniua atokokana.” Ikara paniãretxi pikaminiã, pikamapekari ikinika Moisesi paniãtakiti. ¹⁵Kaxipiri itopa auakani atoko !hitxape. Ninoa karotakakaua, okakakaua itxana. Erepaniko. Kaxipiri itopa auakani atoko hininiã, hixipokakauako.

Aïto Nireekiti

¹⁶Nõtãkikare ia atoko itxapaniko: Hãuiritariko Erekar Matamatakoti oerekinii iua kimapore ikiniõtika. Iua hikimapore oereekari ininiãua, !hikamapiri maerekati hiito nireekiti. ¹⁷Aïto !nirekari Erekar Matamatakoti nireekiti. Iuatxikana Erekar Matamatakoti !nirekari hiito nireekiti. Erekar Matamatakoti mokaiakari itxaua aïto. Ininiã aãkixinire nireekiti !aposota akamini aïto nireekiti xika. ¹⁸Iua Erekar Matamatakoti oerekiniã pikimapore ikiniõtika, pikaminiãri iua nireekiti, ininiã Xoteo kiomaneakorini paniãtakiti !oerekaikari pikimapore.

¹⁹Aimarotapitikari kãkiti ito nireekiti. Inirekari itaniritxi minakotikatika osirĩkini, itanorotxi minakotokatika isirĩkini, mitxitakari atokata isirĩkini. Kãkiti ito nirekari kãkiti xinikaxititini maerekati iito nireekiti. Kãkiti ito nirekari ati kãkiti ito, maerekati ikaminina ikapani. ²⁰Kãkiti ito nirekari teoso kãkiti kamakiti iteosone ikapani. Kãkiti ito nirekari maerekani matamatakoni paniãtakiti ikamini. Kãkiti ito nirekari omanãkaretxi, neenamatchi, xikoretxi,

norikaretxi, iuikaretxi. Käkiti ñto nirekari käkiti omanatiniri apanakini. ²¹Käkiti ñto nirekari ãti käkiti tii. Inirekari okanitxi, poãtakatxi, maerekati kiiniriti ikamini. Ikara atoko inakari maerekati käkiti ñto nireëkiti. Uatxa nipinitai hñte, mitxi nipinitinii atokotxikana. Ikara maerekati kamakani !auapani Teoso auñtetxi ininiãtaãua.

Erekari Matamatakoti Nireëkiti

²²Iua Erekari Matamatakoti aãkixinireë auiniã, !ikara atokoni itxa akamakiti. Iua Erekari Matamatakoti aãkixinireë auiniã, atiraõkiuata. Apoxokoniua. Erekaxinireua. !Katimari aomanãkarauatini. Aamonãkarauata. Erekaua. Akamaenetakiti akamapitika. ²³Ate !iuikaua. !Akamari maerekati añto nireëkiti. Ikara atoko atxa, Erekari Matamatakoti aãkixinireë auiniãua. Ikara atoko aniniã, amisiritiko !auari. ²⁴Kristo nakitiakori aniniãua, !anirekaikari akaminiri maerekati añto potxitakiti, añto nireëkiti. Amanirekakiniti aõkini atokokana, aõkapekari maerekati añto nireëkiti. ²⁵Erekari Matamatakoti txïkitakari axinire auãki inini, ininiãkara makamari ikinipoko iua nireëkiti ikiniõtika. ²⁶!Apakata aãuikiniua. !Apakata aneenamauatini. !Apakata axikotakakiniua.

Himoianatakakiniua

6 ¹Nitariakori, hñte Erekari Matamatakoti nireëkiti kamakanii, himarotakasaakiri añtari kaminiri maerekati, hõtãkikariko iua imaerekani itakanapini ñkapani. Hõtãkikariko hñtiraõkiritika. Iuasaaki erepaniko, kotxi atxiñti hñte apaka nirekari iua maerekani atokotxikana hñkamini. ²Himoianatakakauako hñtapara poiãonoka inakasaaki. Ikara atoko hininiã, hñkamari Kristo paniãtakiti apanakini hñtiretini. ³!Erekari ate iuikiniua. Käkiti minakati: “Apiari nota,” inakari, iuanika misirienetaua. ⁴Erekari nataerekatiniiri notaka kamakiti. Erekari atxiñti? Nikamakiti ereka ininiã, nipoxokoniua. !Apakata nãkixinireë nixinikiniri: “Iua ãti kamakiti apiaerekata. Nota kamakiti poião erekari.” !Apakata ikara atoko ninini. ⁵Ikininape käkiti aua iparïka kasãpaniri. Iuanoka posotari ikaminiri.

⁶Teoso sãkire oereëkari oerekiniãi pite Teoso sãkire, iuasaaki minakati auiniãi pisikari iuamoni. Nipokori atxiñti, txineiro atxiñti, pisika iuamoni, kotxi iua kikiote !auari. ⁷Piteka !pimisirienetapeuako, kotxi !piposotari Teoso pimisirienetini. Teoso misirienetakari !auari. Pikikioteë mitxi pitakakiti iaõka papakapa. Iua atokokana

pikamakiti ereka inini, papakapari erekari. Pikamakiti maerekati inini, papakapari maerekati. ⁸Piito nireekiti pikaminiã, papakapari piito siãkitinoka. Piito sikai ipikitxinoka. Teoso misiritapitikai. Erekar Matamatakoti nireekiti pikaminiã, papakapari iua siãkiti. Iua siãkiti Teosokata átipirika pauini íkapani. ⁹!Apakata asãpakini erekari ikiniõtika akamini. Makamari erekari ikiniõtika, maiotokakanikaua anini. Erekar akamini amaiotokaniã, erekari Teoso sikakiti aãpakapini apokapitikako. ¹⁰Ininiã aposotakasaakiri, makamari erekari ikininapemoni. Merepanika makamari erekari aítariakorimoni Xesosi sãkire auíãkanimoni.

Imapotökire Ôtãkikaretxi

¹¹Hãtamariko ia niõkatsopare mitari. Ia iõkatsopari imapotökire nota niuakoã niõkatsopatakiti. ¹²Apanakini híte sauaki nirekari ninoaka apokaerekatiko, ininiã isãpiretari kãkiti potxitakitinoka. Ninoakara paniãtai hítakiniri takaõtxikari hiitoã. Kininiãpa ninoa nirekatari takaõtxikari hítakini? Ninoa misiritiko monõkoni xika, ninoa paniãtari Xoteo minakanuia takiniri takaõtxikari iitoãna, ininiã Xoteoakori potxitari ninoa oereekiti sãkiretxiti. Inirekarina Xoteoakori apokaerekatinina ninoa. Txamari Kristonoka kamaerekatari kãkiti, kotxi ipípe aamina ípiriãmitakari nopini kãkiti maerekani imaktxakini íkapani. ¹³Ninoa kamisirienererini kamari Moisesi paniãtakiti takaõtxikari itakinina iitoãna. Txamari ikinika Moisesi paniãtakiti !ikamana. Ninoa nirekari híte takiniri takaõtxikari hiitoã, ininiã eereka ninoa iuikaua, kotxi híte kamari ninoa paniãtakiti. ¹⁴Kona ninirekari niuikiniua. Teoso !nirekari niuikiniua. Nota iuikari aãuíte Xesosi Kristo. Iuanokara niuika, kotxi iua ipina aamina ípiriãmitakari nopini ate íkapani. Ininiã nota !nirekaikari Xesosi sãkire mauíãkani nireekiti. Iuatxikana ninoa !nirekari nota nireekiti. ¹⁵Takaõtxikari hiitoã auiniã, iua takaõtxikari !ikamaerekatai híte. Takaõtxikari hiitoã mauakaniã, takaõtxikari mauakani !ikamaerekatai. Teoso txíkitakiniã iua anaakori hininiãua, iusaaki ikamaerekatai híte. Ininiãkara hãkixinire amaneri itxaua. Ininiã mitxi hinireekiti !hinirekaika. ¹⁶Teoso kamaerekaxiniretai híte, ikara sãkiretxiti hãuikasaaki. Iua amoníkai híte. Ikara atoko Teoso kamari kãkiti iua nakitiakori ininiuana, atão Isaeo mekaniriakori ininiuana.

¹⁷Ixipope ia iõkatsopari. Nipinitana nota kamamaxiretakani. !Hĩkamamaxiretapeno, kotxi nimisiritaãkapeka. Nikaro mata auapeka niĩtoã. Auĩtetxi nitiri amotakori karo mata atoko itxa nikaro mata, kotxi Apiananiri Xesosi nitiri nitxaua.

¹⁸Nitariakori, aãũte Xesosi Kristo sikari ikinipoko erekari hĩte ãkixiniremoni. Ameẽ.